

- पहलो राष्ट्रीय अंतरिक्ष दिवस काल मनायो जावेला।
- मुख्यमंत्री भजन लाल शर्मा कह्यो-राज्य सरकार प्रदेश मांय उद्योगां रा विकास सारु हर संभव कोशिश कर रही है।
- प्रदेश मांय गैर कानूनी खुदाई करण वाळां रे खिलाफ कार्रवाई सारु सात पार्टियां बणायी ज्यी।
- राज्य मांय चलाया जा रह्या 'पंचायत संग साथिन' अभियान रा तैत सरपंचां अर साथिनां री दो दिन री आमुखीकरण कार्यशाला आज जयपुर मांय सरु व्ही।

000

पहलो राष्ट्रीय अंतरिक्ष दिवस काल मनायो जावेला। लारला साल 23 अगस्त ने ही चंद्रयान-3 मिशन रो लैंडर विक्रम चांद री सतह माथे कामयाबी सागे उतर्यो हो। राष्ट्रीय अंतरिक्ष दिवस रो ई साल रो मुद्दो है-चंद्रमा को छूते हुए जीवन को छूना: भारत की अंतरिक्ष गाथा। प्रदेश मांय ई ई सिलसिला मांय न्यारा-न्यारा कार्यक्रम राख्या जा रह्या है। काल मनाया जावण वाळा "राष्ट्रीय अन्तरिक्ष दिवस" रा सिलसिला मांय केन्द्रीय संचार ब्यूरो री ओर ऊं जयपुर रा जवाहर कला केंद्र मांय तीन दिन री चित्र प्रदर्शनी लगायी जा रही है। इण रो उद्घाटन आज जयपुर री सांसद मंजू शर्मा कीनो। ई मौके वे कह्यो के काल मनायो जावण वाळो पहलो राष्ट्रीय अन्तरिक्ष दिवस लारला साल अन्तरिक्ष रा हलका मांय हासिल करी ज्यी खास उपलब्धि रो मान करण रो दिन है। ई मौके केन्द्रीय संचार ब्यूरो अर पत्र सूचना कार्यालय जयपुर री अपर महानिदेशक ऋतु शुक्ला कह्यो के राष्ट्रीय अन्तरिक्ष दिवस देश रा अन्तरिक्ष अन्वेषण इतिहास मांय खास मुकाम है। शुक्ला बतायो के ई चित्र प्रदर्शनी मांय चंद्रयान-3 मिशन री कामयाबी सागे अन्तरिक्ष प्रौद्योगिकी मांय भारत रा बधता बूता, उपलब्धियां अर नवाचारां रो दरसाव करी ज्यो है। वे कह्यो के आ चित्र प्रदर्शनी नुवी पीढी ने अन्तरिक्ष विज्ञान अर तकनीक रा हलका ऊं जोड़बा रो काम करेला। 24 अगस्त ताई चालण वाळी तीन दिन री ई चित्र प्रदर्शनी मांय अन्तरिक्ष विज्ञान अर प्रौद्योगिकी रा हलका मांय भारत री खास उपलब्धियां रो दरसाव कर्यो जा रह्यो है। राष्ट्रीय अंतरिक्ष दिवस री पैली वाळी सांझ आज जोधपुर मांय सूचना अर प्रसारण मंत्रालय रा केन्द्रीय संचार ब्यूरो री ओर ऊं एक गैर सरकारी स्कूल मांय विचार गोष्ठी राख्यी ज्यी। शिक्षा विभाग ई प्रदेश री सगळी स्कूलां मांय काल राष्ट्रीय अन्तरिक्ष दिवस मनावण रा हुकम दीना है। स्कूलां मांय राष्ट्रीय अंतरिक्ष दिवस रे मौके कार्यशालावां, व्याख्यान अर प्रदर्शनी समेत न्यारा-न्यारा आयोजन राख्या जावेला।

000

केन्द्रीय वित्त मंत्री निर्मला सीतारमन आज उदयपुर पधारी। दो दिन रा दौरा रा पहला दिन वे आज पश्चिम अर मध्य क्षेत्र रा क्षेत्रीय ग्रामीण बैंकां रा अहलकारां सागे मीटिंग कीनी अर स्मॉल इंडस्ट्रीज डवलपमेंट बैंक रा दफ्तर रो दौरा कीनो। ग्रामीण बैंकां रा अहलकारां सागे मीटिंग मांय बैंकिंग हलका मांय आ रही चुनौतियां रो सामो करण सारु कार्य योजना बणावण रा बारा मांय चर्चा करी ज्यी। वे बैंकां रा अहलकारां ऊं तालमेल सागे काम कर र सरकार री योजनावां रो फायदो जानता ताई पूगावण बाबत् कह्यो।

000

मुख्यमंत्री भजन लाल शर्मा कह्यो है के राज्य सरकार प्रदेश मांय उद्योगां रा विकास सारु सगळा ज़रूरी जतन कर रही है। वे आज जयपुर मांय एक गैर सरकारी कंपनी री ओर ऊं बणायी ज्यो पहला हाइड्रोलिक प्लांट रा उद्घाटन रे मौके बोल रह्या हा। उद्योगां रा विकास री चर्चा करता थकां मुख्यमंत्री कह्यो के वां रा राज मांय प्रदेश मांय निवेश बधावण माथे खास ध्यान दियो जा रह्यो है। वे कह्यो के प्रदेश ऊं दिसावर मांय बेचण बाबत् बत्तो ऊं बत्तो सामान भेजण सारु कोशिश करी जा रही है अर ई सारु ज़रूरी नीतियां ई बणायी जा रही है। मुख्यमंत्री आज ई जयपुर कने वां रा विधानसभा हलका सांगानेर मांय राजकीय उपाध्याय संस्कृत विद्यालय मांय नुवा कक्षा कक्ष जनता ने संप्या। ई मौके मुख्यमंत्री कह्यो के राजस्थान रा पूरा विकास रो वायदो सब मिल र पूरो करांला। कार्यक्रम मांय शिक्षा मंत्री मदन दिलावर अर जयपुर ग्रेटर नगर निगम री महापौर मेयर डॉ. सौम्या गुर्जर ई सिरकत कीनी।

000

प्रदेश ऊं राज्यसभा री एक सीट सारु उप चुनाव बाबत् तीन उम्मीदवारां कानी ऊं दाखिल करी ज्यो कुल छः नाम पानां री आज जांच करी ज्यी। जांच मांय दो उम्मीदवारां रा पांच पर्चा सही मिल्या। एक उम्मीदवार रो पर्चा खारिज कर दियो ज्यो। चुनाव पर्यवक्षक अर राज्य रा मुख्य निर्वाचन अधिकारी नवीन महाजन री मौजूदगी मांय निर्वाचन अधिकारी महावीर प्रसाद शर्मा भारतीय जनता पार्टी रा उम्मीदवार

रवनीत सिंह रा पर्चा रा चार सेट, भारतीय जनता पार्टी रा ई उमी उम्मीदवार सुनील कोठारी रा एक नाम पाना अर निर्दलीय उम्मीदवार बबीता वाधवानी रा एक पर्चा री उम्मीदवारां रा चुणाव एजेन्टां सामी बारीकी ऊं जांच कीनी। जांच रे दौरान निर्दलीय उम्मीदवार बबीता वाधवानी रो पर्चो रद्द कर दियो ज्यो। उम्मीदवार 27 अगस्त ने दोपहरां पाछे 3 बज्यां ताई पर्चा पाछा ले सकेला। ज़रूरत पड्यां 3 सितंबर ने वोट पड़ेला अर वां ई दिन वोटों री गिणती करी जावेला।

000

राज्य मांय गैर कानूनी खुदाई करण वाळां रे खिलाफ असरदार कार्रवाई करण अर औचक जांच सारू सात पार्टियां बणायी ज्यी है। अ पार्टियां गैर कानूनी खुदाई सागे आरसीसी, ईआरसीसी ठेकां अर धर्मकांटां री औचक जांच कर र ज़रूरी कार्रवाई करेला। खान निदेशक भगवती प्रसाद कलाल आ जाणकारी दीनी। वे बतायो के आं पार्टियां मांय तकनीकी अहलकारां ने शामिल करण सागे ही बॉर्डर होमगार्ड्स रा जवानां री सेवा मुहैया करावण री व्यवस्था करी ज्यी है।

000

राष्ट्रपति द्रौपदी मुर्मू वैज्ञानिकां ने आज राष्ट्रपति भवन मांय साल 2024 रा राष्ट्रीय विज्ञान पुरस्कार दे र नवाजा। प्रोफेसर गोविंद राजन पद्मनाभन ने विज्ञान रत्न पुरस्कार ऊं नवाजी ज्यो। कृषि विज्ञान हलका मांय खास काम सारू डॉ. आनन्द रामकृष्णन ने विज्ञान श्री सम्मान दे र नवाजी ज्यो। परमाणु ऊर्जा रा हलका मांय खास काम करण सारू भाभा परमाणु अनुसंधान केंद्र, मुम्बई रा डॉ. अवेश कुमार त्यागी ने नवाजी ज्यो।

जीव विज्ञान रा हलका मांय बेहतरीन काम करण सारू विज्ञान श्री सम्मान भारतीय विज्ञान शिक्षा अनुसंधान संस्थान पुणे रा प्रोफेसर जयंत भालचंद्र उडगांवकर ने दियो ज्यो।

000

बीकानेर रा स्वामी केशवानंद राजस्थान कृषि विश्वविद्यालय रा खजूर अनुसंधान केंद्र मांय खजूर री चोखी उपज व्ही है। ई केंद्र माथे खजूर री भांत-भांत री किस्मां रा करीब डोढ़ हज़ार रूखड़ा है। खजूर री किस्मां मांय हलावी, मैजुल, शामरान, खुनीजी घणी मशहूर है। खदरावी अर जाहिदी किस्मां पिंड खजूर सारू पिछाणी जावे है। खजूर अनुसंधान केंद्र रा वैज्ञानिक डॉ. राजेंद्र सिंह राठौड़ बतायो के ई खजूर अनुसंधान केंद्र मांय 54 भांत रा खजूर मिल सके है।

000

प्रदेश मांय चलाया जा रह्या 'पंचायत संग साथिन' अभियान रा तैत सरपंचां अर साथिनां सारू आमुखीकरण कार्यशाला आज जयपुर मांय सरू व्ही। दो दिन चालण वाळी कार्यशाला रा उदघाटन रे मौके पंचायती राज आयुक्त अर शासन सचिव रवि जैन कहयो के सरपंच अर साथिन मिल र काम कर र ग्राम पंचायतां रो पूरो विकास कर सके है। वे कहयो के साथिनां ने ग्राम पंचायतां मांय बैठण री ठौड़ मुहैया करावण सारू पंचायती राज विभाग ग्राम पंचायतां ने बेगो ई हुकम दे र पाबंद करेला। वे साथिनां ऊं हर महीना महिला शक्ति समूहां री मीटिंग बुला र वां री रपट नियमित रूप ऊं भेजण बाबत् कहयो। कार्यक्रम मांय महिला अर बाल विकास विभाग रा शासन सचिव डॉ. मोहनलाल यादव बतायो के साथिनां ने सिखावण देवण सारू विभाग मॉड्यूल तैयार कर लीना है अर आवता महीना ऊं वां सारू सिखावण रा कार्यक्रम राख्या जावेला।

000

राष्ट्रीय पशु रोग नियंत्रण कार्यक्रम रा तैत 26 अगस्त ऊं डीग जिला मांय 5 लाख ढांढा-ढोरां रे टीका लगाया जावेला। डीग मांय पशुपालन विभाग री उपनिदेशक डॉ. भावना यादव बतायो के 25 अक्टूबर ताई चालण वाळा ई कार्यक्रम रा तैत पशुआं मांय खुरपका अर मुंहपका बीमारियां ने खत्म करण सारू टीका लगाया जावेला। ढांढां रा डॉक्टर सलीम खान बतायो के गायां अर भैंस्यां मांय व्हेवण वाळी ई बीमारी ऊं खुर मांय सूजन आवण सागे ई घाव पड़ जावे है है अर मुंह मांय छाला व्हे जावण ऊं पशु चारो-पाणी छोड़ र दूध देवणो बंद कर देवे है। वे बतायो के फेंफड़ां मांय संक्रमण फैल जावण ऊं मवेशी री मौत ई व्हेवण री शंका व्हे है। दूजी कानी जैसलमेर जिला मांय पशुपालकां ने कारोबार सारू वैज्ञानिक तरीका ऊं भेड़ एवं बकरी पालन री सिखावण देवण रो शिविर लगायी ज्यो।

000

जैसलमेर जिला रा रामदेवरा मांय बाबा रामदेव री समाधि माथे धोक देवण सारू मोटी तादाद मांय जातरू रामदेवरा पूग रह्या है। अ जातरू पाकिस्तान री सरहद कने तनोट माता रा मंदिर मांय ई दर्शन सारू पूग रह्या है।

000

टोंक जिला मांय उनियारा उपखण्ड रा रघुनाथपुरा (मोहम्मद गढ) गाँव मांय काल गहरा पाणीमांयडूबजावण ऊं चार टाबरां री मौत पाछे जन स्वास्थ्य अभियांत्रिकी एवं भू जल मंत्री कन्हैया लाल चौधरी मरण वाळां रा पिरवार वाळां सागे आज मुलाकात कर र वां ने ढाढ़स बंधायो। चौधरी दुःख री ई घड़ी मांय वां ने हर संभव मदद देवण रो भरोसो ई दिरायो।

000

ग्रामीण विकास अर पंचायतीराज राज्य मंत्री ओटाराम देवासी आज जालोर जिला री आलासन ग्राम पंचायत मांय नुवा बणायी ज्या आलासन ग्राम पंचायत मिनी सचिवालय भवन रो उद्घाटन कीनो। ई काम माथे कोई 65 लाख रूप्या रो खर्चो आयो। ई मौके विधानसभा मांय मुख्य सचेतक जोगेश्वर गर्ग अर सांसद लुम्बाराम चौधरी ई मौजूद हा।

000

प्रदेश रा न्यारा-न्यारा हलकां मांय आज ई मेह बरस्यो। चूरू मांय आज व्ही बिरखा ऊं लोगां ने गर्मी ऊं साता मिली। नीम का थाना मांय दोपहरां पाछे झमाझम मेह बरस्यो। हनुमानगढ मांय ई छांटा-छिड़का रा समाचार है। टोंक मांय ई रुक-रुक र बिरखा व्हेवण ऊं मौसम खुशनुमा बण ग्यो। जिला रा बीसलपुर बंधा मांय पाणी रो लेवल 313 दशमलव 40 आर एल मीटर व्हे ग्यो है।

000

प्रधानमंत्री नरेन्द्र मोदी ई महीना री 25 तारीख, दीतवार ने आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला। आ हर महीना प्रसारित कर्या जावण वाळा ई कार्यक्रम री 113वीं कड़ी व्हेला। ई सारू आप मुफ्त नम्बर 1800 11 7800 माथे काल तांई विचार अर राय भेज सको हो। इण रे अलावा नरेन्द्र मोदी एप अर माई जीओवी ओपन फोरम माथे ई विचार बताया जा सके है।

000